



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :

f Tir Yimym

Instagram tiryimym@aolima

YouTube tir yimym

TAPAK 8

Ato kilonser Modi-i kechiba Gujarat state kija semdang?: NCP

Taoba Italy Ato Kilonser Berlusconi kanga shiranger



VOL. XVIII NO. 215 (ADOK 215) DIMAPUR

YANGTEPNÜ (THURSDAY)

MONUPII (MAY) 20, 2021

₹ 5.00

COVID-19 Nagaland: Nisung 244 dak putet, 214 taneptsü angu & 6 asü

Kohima, May 19, 2021 (TYO): Bodbarnü Nagaland nung nisung 244 dak COVID-19 aliba putet aser nisung timtiba taneptsü angu.

Tanü COVID-19 puteta alir nisung 214 tashi taneptsü angu aser nisung 244 dak putetba züingsema nisung ajak agi 18,958 kumogo.

"Tanü nisung 244 dak COVID-19 putet. Parnokji Dimapur nung 115, Kohima nung 88, Mokokchung o Zunheboto nung ter anana (12), Longleng o Wokha nung pungugu (5), Mon nung 3, Peren nung 2 aser Kiphire o Phek nung kaka (1) lir" ta Health & Family Welfare Minister, S Pangnyu Phom-i metetdaksü.

September 21, 2020 nü nisung 223 taneptsü anguba sülen tanü nisung timtibai taneptsü nguogo.

Nisung 18,958 rongnungi 13,706 taneptsü nguogo aser tang 4,426 anepaludar, ta Minster Pangnyu-isa metetdaksü.

Tanü COVID-19 puteta alir

nisung 6 asüba züingsema tasür ajak agi 234 kumogo. Bodbarnü Dimapur nung nisung 5 aser Wokha nung 1 asü. Ajisüaka, tasürtem rongnung parnok 11 bo tanga tashidak ajanga asü, ta paisa ashi.

Bodbarnü tashi nung Nagaland nung COVID-19 alitsü akok ta temolung meleni bilemba sample 1,77,472 tendangogo, ta State Nodal Officer Dr Nyanthung Kikon-ia ashi.

Külen, Mongulbar tashi nung Nagaland nung nisung 1,95,691 nem COVID-19 vaccine indang dose 2,49,579 agütsüogo, ta State Immunization Officer Dr Ritu Thurr-ia metetdaksü.

"Vaccine agirtemji frontline workers 55,647, healthcare workers 15,271 aser arishi kum 45 ser temapur 1,17,475 lir. Parnok rongnungi nisung 53,888-i dose anaprong agiogo. Parnokji frontline workers 27,853, healthcare workers 10,156 aser arishi kum 45 ser temapur 15,879 lir" ta Dr Thurr-isa ashi.

May 31 tashi Nagaland total lockdown asütsü atsülanger May 22 nü sarasademtsü; May 24 nungi online class tenzüksü



Kohima nung total lockdown mapang TCP Gate Kohima nung tetsür traffic personnel ka aser DB kati lenmang anükba noksa nung angur.

Kohima, May 19, 2021 (TYO): Nagaland state nung total lockdown May 31, 2021 tashi atsülanger ta Bodbarnü High Powered Committee (HPC) on COVID-19-i metetdaksüogo.

Külen, Nagaland Baptist Church Council (NBCC)-ia May 22 nü 'special hour of prayer' agütsü ayongzükogo.

State sorkari May 14-21 tashi anogo tenetnü total lockdown asütsü atema ozüing agütsü saka anogo pungu tashi lockdown liaka Covid menatepba mazüoktetba agi tanü HPC-i mapang atsülanger lemtet.

May 14 nü tashi nung nisung 17,531 dak puteta liasü saka Bodbar tashi nung nisung ajak agi 18,958 kumogo. Iba ya anogo pungunü nisung 1,427 dak putetba lir. Kasa mapang nisung 45 asüba ajanga 190 aliba nungi 235 kumogo.

Bodbarnü Chief Minister Neiphiu Rio Chief Minister's Residential Complex nung HPC pur rondak senden ka amen.

"Senden nung onoki total lockdown aliba sülen COVID-19

tensa asadanga liasü," ta Government Spokespersons on Covid-19, Neiba Kronu aser Mmhonlumo Kikon nati sangdong ka nung ashi.

Nagaland nung COVID-19 kanga putetba nung ajemdaker HPC-i May 31, 2021 tashi total lockdown alitsü telemtetba agi.

May 21, 2021 tashi shisaliok rejutem nung summer break aliba sülen May 24 nungi online class tenzüksü. School Education Department-i SOPs latetba ama online class agiyonga aotsü, ta HPC-i tanü telemtetba agiogo.

Oxygen cylinders nüingdakba ama alemtsü aser refill asüba mapang kumzüksü atema Chumukedima Police Complex for Oxygen cylinders indang centralised depot ka lapoktsü aser state kübok tongtipang tesemtem nung Zonal depots lapoktsü atema parnokisa lemtet.

Yimtsüngtem nung iba wara prokshiba azüoktsü atema ASHA workers den Nagaland State Rural Livelihoods Mission

(NSRLM) aser civil society nungi volunteers ajanga community surveillance mapa inyaksü aser iba atema pei pei District Task Force temi inyakyim latettsü ta HPC-isa telemtetba agi.

Tawa doctor 56 tashi mapa nung aniokba ajanga National Health Mission kübok doctor aser nurse mapa tazüingtem nung temporary basis nung nisungtem anioktsü, ta parnokisa metetdaksü.

Külen, Nagaland Baptist Church Council (NBCC)-ia tanga sangdong ka nung Baptist tamangertem dang May 22 nü sarasademtsü mapang balaka alitsü ayongzükogo.

"May 22 anepdang 4:00 ako nungi anepdang 5:00 ako tashi arogo lennirtem aser pei pei kibong asoshi aser aonung 6:00 ako nungi 7:00 ako tashi alima, linük, state, lennirtem, healthcare workers, lokti aser tangartem asoshi sarasademtsü ayongzükur," ta NBCC general secretary Reverend Zelhou Keyho-i metetdaksü.

Asangur kati pa gari ambulance aküm



Dimapur, May 20 (TYO): Tang ama nisung aika tashidak wara tsübuba agi külem kinunger adianu yarii aotsüa arendaka aliba mapang ka, Medziphema nung alir asangur ka tenüing agi John Bendangi pa gari agi ambulance kümer lockdown mapang tepiyong shiranger bentsütsü mulungtetogo.

Pa temeim mapa tajung repringteta, Medziphema nung Administration-ia pa nem Medziphema temeket dang masü Dimapur tashi nung shiranger bener senzütsü asoshi melaogo saka paji shiranger bener jajaba sülen, kidang kinungertem den külemi meyoaktepa melii balaka

alitsüsa akümstsü.

Pa teyari aginürtemi mashi mapang ka nung pa mobile number 70853 87405 ajanga tongteprateptsü akoktsü. Pa gari ya Zen Estilo lir aser number NL-07 C 7354 lir.

Iba osang züluri pa den jembidang, May 19, 2021 aonung 8:00 ako tashi nung Medziphema, Jharnapani aser Chumukedima tashi nung shiranger 2 den Covid putetter parnok 5, ajak agi parnok tenet yarir liasü. Pai ashiba agi, pa ki balaka nung alir aser tetsüi soruchioka bener aruagi tesem balaka nung pa atema chiyongtsü yutsür.

Pangnyu-i Medical College yangludak semdang

Kohima, May 19, 2021 (Agencies): Bodbarnü Health & Family Welfare Minister, S Pangnyu Phom-i Kohima nung Nagaland Medical College yangluba semdangogo.

"Tanü Nagaland Medical College, Kohima yangluba repringdangogo. Mapa inyakba nung temolung asü aser

contractor temi nendaka inyakba atema tenüingsang agütsür" ta Minister Pangnyu-i metetdaksü.

Tanü contractor temi tetsükdaksü ajurubatem lemsatepba Pangnyu-i agizük aser Department-i akokba tashi yaritsü ta nangzük.

Kohima nung Medical College yanglutsü atema 2014 kum lung

azüing aser Centre-i Rs of 189 crore endoka yanglutsü molunga agizük.

Medical College ya Centre o state sorkar tsüingda 90: 10 inyakyim nung sen endoktsü lemtet. Iba nungi Centre-i Nagaland sorkar nem agütsütsü aliba Rs.171.10 crore agütsüogo ta MoS, Ashwini Kumar Choubey-i metetdaksüogo.

Covid-19 agi shirangertem ita 3 lir ang vaccine agütsü

New Delhi, May 19, 2021 (Agencies): Covid-19 agi shirangertem taneptsü anguba sülen ita asem lir ang vaccine agütsü ta Bodbarnü Union Health Ministry Secretary-i Rajesh Bhushan-i metetdaksüogo.

National Expert Group on Vaccine Administration for Covid-19 (NEGVAC)-i ashiba Centre-i molunga agizükogo ta paisa ashi.

Vaccine dose agiba sülen Covid-19 aliba putetertemia ita

asem lir ang dose tanabuba agütsüla. Külen, plasma therapy ajanga anepalurtemia ita asem lir ang vaccine agütsüla, ta Rajesh Bhushan-i Chief Secretary ajak dang shidi ka nung metetdaksü.

Covishield vaccine dose ana 12 lir ang agütsü ta lateta aliba ano hopta 16 lir ang agütsüla ta NEGVAC-i ashiba Centre-isa molunga agizükogo.

Kinü tanurtem mamatzü yongdaksüba tetsütemia

vaccine agütsü akok ta ashi saka mashisa tetsürtem agütsü atema kulitem jungjunga bushiteptsü ta Secretary-isa metetdaksü.

Kanga shirangertem mesüra ICU nung anioka anepalutsüpurtemi hopta 4-8 shi ka atar ang vaccine agütsüla.

Covid-19 vaccine agiba sülen mesüra Covid-19 agi shirangba sülen RT-PCR negative putetba sülen anogo 14 lir azü tenlatsü akok.

Asür nem tim akum agütsütsüla: Y. Kikheto Sema



Nodal Officer Y. Kikheto Sema IAS den Deputy Commissioner aser Commissioner of Police, Dimapur nungertemi May 19, 2021 nü Deputy Commissioner, Dimapur indang Conference Hall nung osangbener den jembidang tangokba noksa ka yangi angur.

Dimapur, Monupii/May 19 (TYO): Dimapur nung COVID-19 dak sendakba inyakyim ketdangsütsü atema sorkari shimteta alisang, Nodal Officer Y. Kikheto Sema, IAS ajanga nüburtem dang asür nem akum agütsütsü ayongzüka liasü.

Deputy Commissioner, Dimapur indang Conference Hall nung May 19, 2021 nü osangbener den jembida mapang, COVID-19 agi asüba nisung tasü mang Medical department ajanga SOP agüja aliba ama süngten nung mesen asütsü mozü züka shibangerbo aremtsü amshiba mapang tashidak memenatsü, ta Sema-i ashi.

Yimtsüng/colony kar nung ketdangsürtemi COVID19 agi asüba tasü mang bener arutsü memelaba osang angashia temolung shirangba lemsatepba

mapang, iba ama meshidak angatetba aser tangatetba tai ya samadaksütsüla aser yimtsüng ketdangsürtemi tasü mang bener aruba menokdangtsüla, ta pai ashi.

Sorkari asüngdangba ama nija mozüki temi amalitepba ajanga tang Dimapur nung COVID-19 agi shiranger anepalutsü atema yipten 296 lir aser yangji ICU facility aliba yipten 40, oxygen aliba yipten 192, oxygen maliba yipten 25 aser khen atema yangluba yipten 10 lir, ta pai metetdaksü.

Hopta tatem tashinung yipten 335 ajungtsü imlar, ta pai ashi.

Osangbeneri nübur tenzüka atema state sorkar tenüng nung pai tenüngsang agütsü aser COVID-19 anema raraba nung osangbener ya tongtipang frontline worker ka lir, ta ashi.

Deputy Commissioner,

Dimapur. Rajesh Soundararajan, IAS ajanga Dimapur nung COVID-19 ketdangsüba indang osang tongmelang agi ashiba mapang, entry point tem nung tenokdangba agüja lir, ta metetdaksü.

Senzüsempongertem entry point nung Negative RTPCR report meshir aser aji malirtem yangji tendanger, ta pai ashi.

District Task Force, Dimapur ajanga mapa kanga junga inyaker aser Dimapur nung tensa junga lir, ta Commissioner Police Dimapur, Rothihu Tetseo IPS ajanga ashi.

Ozüng balala benoka amshiba dak sendakba nung taküim aibelener nisung 6,500 shi merenshiogo, ta Rothihu-i ashi.

Paisa nüburtem dang taziükba alitsü aser tangatetba tajung nung mapa inyaksü ayongzüka liasü.

AKM-i nüburtem maneni ayongzüker

Dimapur, Monupii/May 19 (TYO): Ao Kaketshir Mungdang (AKM) ajanga sangdong ka nung, COVID-19 tashidak wara agi alima ajaka amokbanger nüburtem jenti timtema alidang asen jila aser temeket yimtsüng nung alirtem ajak wara nungi kümzüka ayutsü mechi lenla balala nung inyaksangshirtem talisa Administration-i anir Medical Department, Police personnel aser frontline workers ajak

dang pelar, ta ashi. Anungji sorkari latettsüba ozüng nung ajemdaker COVID-19 wara nungi tulu tila ajak aser asen lima kümzüka ayutsü ajungshir, ta AKM tir Nungdokyanger Ao aser tongti zülur, Nekmi Longkumer nati sangdong nung shia lir.

Maneni asenok ajak longjemer iba wara koktetsü asoshi Tsüngrem dang sarasademti, ta AKM-isa ayongzüker.


Mokokchung nung COVID-19 dak sendakba Helpline number lepokogo

Mokokchung, Monupii/May 19 (TYO): Mokokchung district nung aliba nüburtem kar danga yimra (flu like symptoms) mesükba agi tonger alinungbo medical teyari atema na anasa aliba Health Centre/Hospital mesüra kidang nungi item contact number; (i) Medical Control Room No. 9856087076 (ii) Covid-19 Hospital Helpline No. 8119041793 (iii) DTF Helpline No. 005099639/7005303787 nung tongteprateptsü akok, ta Deputy Commissioner, Mokokchung, Limawabang Jamir-i sangdong ka ajanga metetdaksüogo.

maparen indang terataba kar danga lira, Mokokchung District Task Force for Covid-19 ajanga teyari agütsütsü asoshi Helpline Number tenzüko, ta Mokokchung Deputy Commissioner ajangasa metetdaksü.

Item Helpline Number nungya COVID-19 dak sentakba tasüngdangnüba aser nüburtemi rataa aliba ajak asüngdangtetsü; (i) Medical Control Room I/c - 9856087076 (ii) COVID-19 Hospital I/c - 8119041793 (iii) DTF Helpline I/c - 7005099639/7005303787 (iv) Cemetery/Crematory I/c - 9366926238, ta sangdong ajanga ashi.

Noklak & Tuensang District Task Force pur senden amen



Deputy Commissioner, Noklak, Reny Wilfred, IAS menden sür May 19, 2021 nü Deputy Commissioner indang Conference Hall nung Noklak District Task Force on COVID-19 pur senden aliba noksa nung angur.

Dimapur, Monupii/May 19 (TYO): Deputy Commissioner, Noklak, Reny Wilfred, IAS menden sür May 19, 2021 nü Deputy Commissioner indang Conference Hall nung Noklak District Task Force on COVID-19 pur senden ka mena liasü.

ajungshia liasü. SP-isa dokan kiburtem dang tongtipang osettem talitapong bendena mayutsü ajungshi aser district nung maneni tapi agi COVID-19 sample bendentsü, ta metetdaksü.

COVID-19 Hospital nung TrueNat machine amenokogo aser tendang tenzüko aser ID registration agiba mapang lir, ta Deputy Commissioner-i senden nung metetdaksü. Tongtipang osettem dak sendakba nung, district nung ita ka atema chiyongtsü aser nüngdakba osettem peria benoka lir, ta pai ashi.

Tang tashinung COVID-19 positive kata District nung puteta mali ta SDO (Civil) & Administrator, Noklak ajanga metetdaksü aser ajak dang maneni kasa yimya nung alitsü ayongzüka liasü. Paisa dokan kibur ajunga dang COVID-19 mozü agitsü ayongzüker, kechi aser iba tashidak yagi parnok temelaba meneptsüsa jenjang nung lir.

Paisa senden nung adenertem dang nüburtem COVID-19 mozü agitsü atema ajungmesotsü aser awareness agütsütsü ayongzüka liasü. SP Noklak, Pritpal Kaur, IPS ajanga frontline worker tem dang COVID-19 agi menepa alirtem anepaluba mapang iba tashidak nungi kumzüksü mera tapet agitsü

Iba tashidak wara den raraba nung arogo temia akokba lenmanung yariteptsü renema lir, ta Executive Secretary, KBCA Hempao Lam-i senden nung metetdaksü. Maneni Medical Officer, Noklak, Dr. Chongya-i COVID-19 mozü agiba tajangzüker aser mangatetjem aliba indang rateta shia liasü. (Maneni tapak 3 nung...)

Mokokchung BJP ST Morcha-i frontline worker den tepela lemsatep



Mokokchung SDO (C) Temsuchuba (abelen nungi pezübuba) den BJP ST Morcha, Mokokchung ketdangsürtemi May 19, 2021 nü Mokokchung nung frontline worker nem chiyongtsü agütsüba mapang tangokba noksa ka yangi angur.

Dimapur, Monupii/May 19 (TYO): India Ato Kilonseri ayongzüker Seva Hi Sanghathan Abhiyan (Service is an Organisation mission) ama, BJP Mokokchung District indang ST Morcha puri district nung frontline worker, talisa lockdown ozüng benoka amshir security forces nem khen chiyongtsü agüja liasü.

worker ajunga dak pelar ta ashiba temaitsü ka lir," ta BJP Mokokchung indang ST Morcha tir, Oyimpong Longchar-i ashi.

Frontline worker temi takum bendanga agütsür nübur kumzüka ayutsü mechi meranga inyakba angatetba atema Longchar-i ST Nagaland State tir Wanphong Konyak aser BJP Nagaland State tir, Temjen Imna Along na danga pelaba lemsatepa liasü.

Oyimpong Longchar-i tang aser tarutsü nunga frontline

worker akokba lenmanung yaritsü molunga lir, ta ashi.

ST Morcha, BJP Mokokchung ajanga Mokokchung jila temeket aser telungzüker nung tanükba agütsür aser achayanger - Nagaland police, traffic, IRB aser Dobashi - atema chiyongtsü ya renemja liasü.

Parnoki Ao Kaketshir Mungdang (AKM) office semdanga kaketshirtemi iba tashidak den raraba nung shilem tajung agiba atema tenüngsang agüja liasü.

Manipur sorkari ambulance siren mamshitsü tuyur



Imphal, May 19, 2021
(Agencies): Manipur sorkari ambulance siren madokdaksütsü atema memorandum ka sangdongogo. Manipur nung COVID tensa nung ajemdaker sorkari iba telemtetba agi. Ambulance indang siren ola adokba ajanga

nisungtem aoksa Iba memorandum nung Director of Health Services, Manipur Dr. K. Rajo Singh-i sign asü aser Chief Medical Officer, Medical Superintendent, Private Hospital aser private ambulance ajak dangi iba osang yokogo.

Lenmang noktanga mapang sirens amshitsü melar saka tangbo Manipur nung gari lenmang nung traffic mali azüingazünga lir ta sorkarisa metetdaksü.

Police-i Jorhat nung taila magistrate ka apu

Jorhat, May 19, 2021
(Agencies): Titabar nung magistrate ka ta jilu ayir ka Assam police-i puogo.

Iba nisung ya Biswajit Dutta lir aser tanü Jorhat nung Chinamara police-i apu.

Chinamara police station nung pai pa Titabar nung

magistrate ta tejak shiyuba sülen pa apu. Police-isa Biswajit ket nungi gari ka puogo.

Yaküm Biswajit-isa pa doctor ka ta shia liasü.

Iba dak sendakba nung maneni bushisüngdang südar, ta police-i metetdaksü.

Arunachal nung nisung 356 dak Covid19 putet; 3 asü

Itanagar, May 19, 2021
(Agencies): Tesüiba ghonda 24 tsüingda Arunachal Pradesh nung nisung 356 dak COVID-19 aliba putet aser 3 asü.

Mongulbarnü sample 4,888 tendangdang nisung 356 dak COVID-19 aliba putet, ta Arunachal Pradesh Covid19 bulletin nung metetdaksü.

Tesüiba ghonda 24 tsüingda Covid19 puteta lir nisung 302 taneptsü angu, ta parnokisa ashi.

Tang tashi nung nisung 19,977 tashi taneptsü nguogo aser taneptsü anguji 88.94% lir, ta Arunachal Pradesh Covid19 nungsa ashi.

Tanü puteterem züingsema Arunachal Pradesh nung COVID-19 puteta ajak agi nisung 22,462 kümogo. Tang nisung 2,397 anepaludar.

Arunachal Pradesh nung district Clusters 7 atema Counselors indang telok 7 lapoka lir, ta health department-ia metetdaksü.

BTR, KA and DH district council CEM nem cabinet jenjang agütsür

Guwahati, May 19, 2021
(Agencies): BTR (Bodoland Territorial Region), Karbi Anglong aser Dima Hasao indang district council nung Chief Executive Members (CEMs) nem cabinet jenjang agütsüogo.

Bodbarnü Assam Cabinet senden amendang iba telemtetba agi.

BTR nung CEM ji UPPL president Pramod Boro, Karbi Anglong Autonomous District Council (KAADC) nung CEM ji Tuliram Ronghang aser North Cachar Hills Autonomous Council (NCHAC) nung CEM ji Debolal Gorlosa nunger lir.

Maneni, tanü Cabinet-isa Assam nung Advocate General inyaksü atema senior advocate Debojit Saikia shimogo.

Debojit Saikia ya Assam Cricket Association nunga Secretary lir. Pa ya taoba mapang Ranji asayar ka aser ketdangsür ka lir.

Tanü senden nungsa Oxygen plant tasen yanglura state sorkari power supply 100% angati agütsütsü lemtet. Oxygen plant tejentem tanaben lapokra sorkari parnok nema power supply 100% agütsütsü ta telemtetba agi.

Tang nungi Assam nung I/C

minister masü Guardian Minister ta ajatsü aser parnoki pei pei district anepalutsü ta Cabinet-isa telemtetba agiogo.

Assam sorkar indang mezüingbuba Cabinet senden nung Finance Minister Ajanta Neog lenisüba kübok luden ka tentetogo aser parnoki Assam nunger lanur lakh 1 nem mapa agütsütsü atema lenmang bushiteptsü.

Maneni, Cabinet-isa Information & Public Relation minister aser health minister Keshab Mahanta na cabinet indang spokespersons inyaksü shim.

Dibrugarh Central Jail nung nisung 53 dak COVID-19 putet



Dibrugarh, May 19, 2021
(Agencies): Altogether 53 inmates in Dibrugarh Central Jail tested positive for Covid19 so far.

Dibrugarh Central Jail nung puoka alir nisung 53 dak Covid19 aliba putetogo.

Dibrugarh Central Jail nung tawa apuba ULFA(I) lennir Jibon Moran puoka lir aser pa dak-a Hombarnü Covid19 putet.

Iba tepuokdak nisung 530 puoka lir. Parnok rongnungi Mongulbarnü nisung 223 tendangdang nisung 53 dak

Covid19 aliba putet aser 171 dak negative putet.

Maneni, tanüingba nisung 306 dak Covid19 tendangtsü ta ketdangsürtemi ashi.

Iba osang ya Dibrugarh deputy commissioner Pallav Gopal Jha-i metetdaksü.

Mongulbarnü Dibrugarh district nung nisung 445 dak COVID-19 aliba putet aser nisung 6 asü.

Külen, Dibrugarh district administration-i Covid19 azüoktsü atema Covid19 inyakyim akangakanga benokogo.

Tripura nung school 20 'specified category' kübok dendaktsür

Agartala, May 19, 2021
(Agencies): Tripura sorkari CBSE nung züingsema aliba sorkar aser sorkari teyari agütsüba school 20 "Specified Category Schools" ta sangoktsüogo.

Iba 'specified category' nung adenba school 20 nung Jawahar Navodaya Vidyalayas aser Kendriya Vidyalayas ama

inyaksangshitsü, ta education minister Ratanlal Nath-i ashi.

"Council of Ministers-i The Right of Children to Free and Compulsory Education Act, 2009 nung Arrla 2(P) nung ajemdaker school 20 specified category schools asütsü molunga agizükogi" ta Nath-i osangbener dang ashi.

Tang item school ajak nung

CBSE inyakyim nung academic curriculums agir. Tripura nung school 29 tashi CBSE nung züingsema lir, ta paisa ashi.

Tripura nung quality education agütsütsü nükjidong nung school education department-i reforms 25 aser higher education department-i reforms 10 bener aruogo, ta Nath-isa metetdaksü.



Kokrajhar district kübok Srirampur NH31C nung police-i Rs 35 lakh alangba teak süng apu. Truck gari ka nung teak süngji süngmok abenba bostatemi miibanger bena liasü ta Kokrajhar police-i metetdaksü. (Kokrajhar, May 19)

Noklak & Tuensang ... (Tapak 2 nungi...)

Kasa anogo Tuensang District Task Force for COVID-19 pur senden ka Deputy Commissioner, Tuensang indang Conference Hall nung mena liasü. Iba senden ya Deputy Commissioner aser District Task Force, Tuensang indang mendenpuba , Kumar Rannikant, IAS lenisüba kübok mena liasü.

Iba senden nung tang district nung lockdown benoka aliba indang osang agitep aser tang amshiba ozüingtem nung aotsü lemtet.

Medical department ajanga COVID-19 hospital atema district nung oxygen aser yipten aliba indang osang agüja liasü.

Senden nung BSL-II Lab inyakyim indang jembu aser

timtem tetsükdaksü jenti ajuruaka BSL-II Lab ya meshibangtsü pangjema liasü.

Sorkari nungi senotsü maru tashi iba lab nung tongtipang osettem aser achi-ajemtsü atema District Task Forces puri senotsü tsütsü yaritsü lemtet.

Maneni parnoki Government Polytechnic Sedam nung COVID-19 asymptomatic patient pur kidang isolation atema facility malir asoshi COVID-19 Care Center amenoktsü lemteta liasü.

Tuensang nung tapi agi sample bendenba telok block ajak nung mapa kanga junga inyaker aser ano yimtsüingtem nunga oa tendangtsü lemteta liasü.



TIR YIMYIM YIMOBILEM (EDITORIAL)

DIMAPUR YANGTEPNÜ, MONUPII(MAY) 20, 2021

Temeim mapa inyaktsü tenzükogo

Tang ama mapang tamajung timtem toudi mapang ya tashi akar aser temeim mapa inyaknertem asoshibo mapang tajungtiba lir. Milen tajung akayonga amang marura ibaji takidak maka, anungji milen tajung akar asoshibo amangjiang milen tsükloktsubaji mapang tajungtiba, saka ano milen akayonga amang nung tsükloktsuba dena korura ajia nungdak maliba oset ka ama den medemdanga tang ya asen kidang akaba milen tilaka asüyonga bener oa, amang alidak tsükloktsubaji kanga nungdaka kumogo. Aji oda, government ket nung kecha maka timtemba rebrangteta, tezua atangyonga matang kümer, lokti, arogo aser kija kibongi pei pei alidak Task Force aser mozü kitem nem senotsü aser nungdak oset tenla maneni agütsüba angur. Aji oda, arogotemi pei arogo ki quarantine center asütsü agütsüba, mozü kidang kiojen yanglutsüba aser joko nisung karibo pei gari agi ambulance kümer shirangertem angati yaritsü mulungtetba aser ano Covid agi shiranger nem angati mozü aser chiyongtsü agütsüba mapatemji nisung dang meimba mapa kija masü saka Tsüngrem külemba mapatem asütsü. Tang ya shirangertem asoshi dang masü saka shiranger yarirtem aser ano asürtem asoshi teyari kanga nungdakba mapang lir. Mozü kidang Covid agi shiranger yarirtem doctor aser nurse-tem ya pei kidangi maor, anungji parnok mozü kidang mapa temer government-i renemtsüba quarantine center nung amonger. Tang tashi nung quarantine center ya government circuit aser rest house ama kitem amshidagi aser Kohima nungbo Ao Baptist arogo indang Jubilee Memorial Guest House dena amshitsü agütsüogo. Ano, mozü kidang inyakertem kidangi maor asünungji, tangbo ano mozü kidang soruchioka chiyonger, anungji parnok atema jangotsü den süng tatsütsü mesüra gas stove aser cylinder nungdaker. Ano Dimapur nungbo Sikh (Punjabi) nungertemi Covid Hospital nung shiranger anüker kinungertem nem anepdang breakfast den anogo nung chi anaben chiyongdaksür. Ano asürtem kikong karbo tasü mang bener aotsü süngdena malitetba purtem lir, itemji atema Sema nung arogotemi Dimapur Covid Hospital nung yaridagi. Item ama mozü kidang inyaker aser shirangertem atema government-i magütsütetba nungdak aika adoker, itemji asüngdangtepa agütsütsüba temeim mapa inyaknertem atemabo tang ya mapang tajung lir. Atangji, alima nung ka ama ali masüji, tang ama mapang tamajung nunga pei akaba agi yaritsü melen pei agitsüang bilemba purtema alitsü, ajisüaka item denji toktepa aitsütepa kazü dang asenok ajak sümatsü, anungji kitsükkirong lendong mapang tamasa mi inseptsü merang ama, asenok ajaki pei kidang nungi tenzuka mozü ki aser quarantine kitem tashi nung shilem agia iba tashidak wara ya tama nokdangtsü nungdaker. Ano, tashidak wara tensa ya kecha mejungi küma aoer asünungji, lockdown ya iba ita tatem tashi aotsü metetdakja lir, anungji anogo shia ayanga chiyonger kibongtembo aika chiyongtsüa maka timatemtsü. Atangji, takar chiri ayatzüra memetet ta tsüraburi jembiba ama, ita sen shitak angurtem aser kaa itta alirtem asoshibo ita junga kecha meinyak shibanga ayuyonga, ayaba aser tzüraba timtemjibo kecha balaka majurutsü, ajisüaka ita sen machir aser ayangertem kibong tia bilemja, tamasa inyakba amato tanga ano arogo, lokti aser kija kibongi temeim mapa inyaktsüa adoktsü. Tang ama mapang tamajung majuru nungbo temeim mapa inyaktsü mapang aser tesema mengula aser timtem aliba purtema mejangjala, anungji mapang tajung nung asenoki kidang kibong nung dang masü saka tenla kidang aser lokti senden nung temeim indang jembiba to mapa agi sayutsüba mapangji tang ya lir. Temeim indang jembiba to kaketshirtem tatidang agütsütsü atema lesson bushiba mapang amato liasü aser tang yabo shitakba tatidang agütsütsü mapang tongogo. Aji oda, tang yabo takartemi Zakiai Yisu dang ashi amato, "kü rongsen tesadang ka sensaker nem agütsüdi aser ni ochimashibalen nungi rongsen langka danga bendena lira, aji pezüsü agi talila kümer nübortem nungdak asoshi agütsüdi," ta ashitsüba mapang lir. Iba amaji ka meshitetra aser meinyaktetra Zakia bendenba rongsenji paa magishitsüba mapangji tang ya lir. Shitakba nung, tashidak wara ya masü saka ibajiang tsüba temeim mapa inyaktsüba mapang tajungji takar aser makar ajak atema tang ya lir.

OLEMSABANG

Taochi ya kechi dang ajar, naina meteta lir ma?

~ R. Imkong Lkr, Mangimen Area, Lahorjan,
Karbi Anglong, Assam

(Yashi adok nungi...)

Saka student-ba tu tia maka tanga subjecttem ajak nung pass markbo ngur liaka ongko (maths) subject nung marks ana agi pass markji metongteti liasü. anungji parnok ongko (math) master-ba jagi tanubusang atemaji kanga junga bilemdanger kelen, tatem nung yamai shisatet. Iba student ya aki mapang nungbo (discipline) yamya yimbong nung kanga junga aruba student ka ta ni rebrangteter, saka taküm ya pa ongko (maths) subject nung marks ana agi pass mark metongtetba yong fail sütsüra, ashiko pai taruba kümjibo schooli moonütsü akok aser pai schoolji toktsütsüsa akümtsü, idangjibo pa atema tang takoksa makümi par tsürabourtem asoshia takoksaji ulura asütsü ta bilema aru. Aser ano pai taruba kümjia odang kasa class nungji meranga mendi ta asüyonga taoba küm anogo 365 tubo amajok nung mapang endoka azüngba tang liasü ta tezü tanga bilemstü, aser kelen student tasenpurtem den külemi amendang nema metangtetsü, iba denji pa yagi kanga meranga kümshia pass asüyongbo taoba küm külem classpurtem tubo kodanga memeneptsü ta asünungji pa ya odang marks ana enoksemtsür pass sütsüdi ta ser pakümüji takoker rongnung tendaktsü. Aser kenü anogo (maths) masterba tu yimdong nung kazüyonga senzüyaa aliba mapang ka, pai student ka pa subject nung marks ana agi yaria pass sütsüsang tu ajurua pa anasai jaa ashi, hai asangur! Na ya ongko (maths) fail sür liasü, saka ni na kanga meimba yong marks anaji enoksemtsür pass sütsüogo no ta shia liasü, anungji nai taruba kümjibo kanga meranga zügangma ta shir kelen tenaji pilaa tok. Yamaji student ka tamakoker rongnung dena aliba tu temeim agi takoker rongnung dendaktsüba dangji taochi tulu sayuba ta ajar.

Anungji tepela tulu agi tekümnajibo iba student jagi kanga meranga zünger final exam nung tu kagna junga pass süteta par classpur ajak rongnung pa tu tanapuba jenjang nguteta takok tulu ngutet. Iba sülen tubo pa tu class temaba temaba ta pass süyonga tur kelen, tesülenbo Govt. office ka nung tular saap ka aküm. Idangjibo parnok ongko (maths) masterba tu mapa nungi pension adoker joko tambour kümer liasü. Aser kenü anogo tambousang tu office kati pa nungtak tuluka atema oyaa liasü, aser kodang pa tu officeji atong, pai officerba mena aliba takdang kiküm nungjagi "may I get in sir? ta ashitang saap-ba jagi tambusang tu rebrangtet, anungji pa menden nungjagi yakta nokdaker asema oagi tambusang dak tu azüit aser saapba jagi tambusang tang ashir, sir! naa sang tanübo koda ser kü office-i arutsüsa aküm ya ta asüngdangtang tambusang tu kanga aoksa tok! Aser na ya shiba? Ta tambusangi saapba dangji asüngdang nung, saapba jagi kecha melangzüi tang pa teka nung tu züp ta ammeter annir oagi chair tajung ka nung mendaktsü, aser saapba jagi pa table nung aliba calling bell tu kring ta anemtang par peonba tu yakta saapba takdang jagi ait, idangji saapba jagi par peonba dangji yakta süngo special cup ana bener arujang ta shir yok. Iba sülen tu par peonba jagi amtsük tajungla den süngo khen agi special cups ana bener arutsüji iba tu chai jema alitang saapba jagi tambousang tang ashi, sir, ni ya nai yaria ongko (maths) subject nung marks ana agi fail ser lia kü nem takok agütsüsang tu ago ya ta ashitang, tambusang mulungjang nungi tepela mesemi nüktzü aneta tena tu azütepa mapangji tesüngmangtsü senti mapang mamatetba tepela tulu liasü. Iba sülen tu tambusang ya kechi nungtak atema office jagi aru, iba tu jembitepa or kelen pai asüngdangba dang nungjagi anaben agi talila peritsür kelen, saapbar driverba tu jar tambusang tu par ki tashi meinokdaksü. Iba sülen, tambusang tu pelaseta alima nung tatsüka lir kelen, asülimai oatok ta otsü jagi ashir.

"Iba ocet nung student ka nem par ongko masterbai marks talila ana enoktsüsemmer tatitang nung takok ngudaktsüba school temzüng agibo memelatsü südi, saka experience tesayur kaji pa atema "safety side" kabosa yur kelenang student kar dang temeim sayur asünungji, taoba mapang nungbo class X (ten) final exam nung students rongnung kari additional subjects kar agi kelen pai mesüra lai main subject ka nung fail sür liar idangji additional subject agia aliba nungjagi pass mark ngur kelen, tanüngba talila marks ngua aliba nungjagi agizüker fail süa aliba subject nungji enoksemtsür pass süjasa aru ta masterba atemaji temeden o ka shisemer."

Iba ocet tetenzük nung asenoki taochi indang jembia tenzükba amatu asen tebo Tsüngrem shiba kodak nung lir, pai asenok meimchir dang kanga aochia meimba yong pa ajaso chir asen menen alangzüktsü asoshi alimai yok ta shia angur.

Shibai iba ocet ya zülur paa iba otsü mesükba tatalokba ka ajangshai aruba taküm ka asünungji, iba dakji ajemdaker iba ocet tila ka ya zülüogo. Saka kü taküm nungbo saap tularbo mekümdang ta shisemer. Iba ocet azünger ajak moajangma.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Tamang Akangshitsü Ayongzüker

- Rev. Dr. Mar Pongener, Executive Secretary, ABAM.



Tang ama Covid-19 wara tesashiba kuma ajaklen tetsüba aser shisabulu agi sünger litepba mapang ka nung ya, amangba purtem ajak dang Tsüngrem dak imlaba tamang (1 Korint 16:13) mesamai teti akanga alitsü ayongzüker. Asen aliba tensa sünepa akümtsü asoshi Tsüngrem dak imlatsüba dak alaka tanga lenmang kecha mali kumogo. Ajak takoksang Tsüngrem (Yerimia 32:27) madang apudaker, tamang agi lumia sarasademba ajanga tanü tensa sünepa akümtsü.

Taoba 2020 küm nungi Covid-19 wara den rarayonga arudang arogo, lokti tentet balala, kija aser kibongtem ajaki tamang aser temeim mapatem aika inyaka aruba angudang kanga pelar aser Tsüngrem tenüng asanger. Talisa, Pastor-tem lenisüba nung arogotemi laishiba tesayuba nung akanga ammeter Tsüngremer

tenyaba tapet mapatem tamakok maludaktsüi inyaka arubayong tamangertem tamang nung tashi itta lidaktsür. Tang ya taoba küm dang nungi kanga tamajungba tia kati asenok menepa lir. Anogo shia tasürtem züiner aser mangyim tejashi tajepba olatem tali akümer. Pei taküma mapayui doctors, nurses, task force züngsemtem aser pastortem tasürtem temang anepalua, asü pila sentong yanglua, tashitak menatsü tsüba bilemaka tasü itshir, leper tashi oa sarasadem agüja tasürtem rema toktsüba, item ya, atangji, tamang mapatem lir. Yamai pei ataba mapatem bendanga agüja inyakba angudang parnok nem tenüngsang agütsür aser ano maneni awajema inyaka aotsü ajungshir. Khenkhen tamakok ajurushia atadang, kati ka aibenlenba indang kisüng tali tuteta mejembitepi, par mapa tajung asoshi tapet tenüngsang agüja tasü itdaktsüba otem agi ajungshiteptsü nungdaker.

Anogo shia Covid-19 wara agi atonger tali tali puteter. Item adianutem tekolok shisatsü ajak rama-a oa shisabulur. Wara agi tonger tasütsü tsübuseta alidang karibo parnokji balaka repranger mesüra parnok den aki ama sademsadema meliteter. Ajaki senzuka toktsüogo aser temeimer mali ta bilemdaktsür. Iba jagi parnok tekolok shisatsü tali timtemdaktsür. Iba wara agi atongba ya maksü ka ama mangatetsüla. Item adianutem asoshi aria bilemba tanela dener tamang sarasadem agi yariteptsüla. Shiranga aliba adianutem den akokba lenmangtem nung sademsadema yaritepa libalirutsüla. Yisu tesayuba, 'Ni nenok kechi koda meim, aji oda nenoka kati ka den meimtepang' (Yohan 15:12), ta asüba tenyaba mapa ya inyaktetsü merangdi.

Nisung o nisung na meyoktepba maliba ajanga Covid-19 wara menatepa aoba nokdangtsü ta metet nung lokti atenshia sentong balala agitsü mekoki kümdaktsür. Senso tajung ka ama agüja aliba SOPs nendaka benshitsüla aser Tsüngrem chir ka ama kechi tia nung lidir liaka asen tamangba jenjang remsepa moudaktsüi akangshitsüla. Tensa kanga mejungi akümba agi tesem aika nung lokti tekülema (corporate worship) magitetsüsa kuma aoer, saka asenok tamangba jenjang ajema makümtsü merangdi. Tensa agi na alidak tekülem sentep magitetsüsa kumaka, Tsüngrem külemba kibo lapoka ali nung, idakji na kisüng süaka oa tamang agi Tsüngrem den maneni jembiangma. Lockdown mapang ya Tsüngrem o tali zünga aser sarasadem tali takangba agitetba mapang ka südaktsüdi. Tetsüba aser terata tia nung liaka, asen Tsüngrem dak tamang akanga yur (T.Ken 27:3) alitsü ayongzüker.

ANOGO ABEN TSÜNGREM DEN

Medendaktsüba azüh

"Tang khrista züh agi asenok medendaktsü nung idakji chia Tsüngrem ain adokba nungi asenok pa ajanga kümzüksü". Rom 5:9

Nisung taküm nung kechi mapa nung südir süaka ajaki hau ta mesütetra iba nungji jangratemtsü mesüra tepela ka mali, kechiaser ajaki junger ta agizüktetba jagi temedenba ka agütsür. Adem kodang Yihova Tsüngremi ashiba mangai pei mulungba nung alitsü tenzük iba mapang nungji temenen taittsüba süngrai pa dak alen aser iba taittsüba tanela jagi par kibong nung yimsü südakja kati ka aitsütepa arur tatem nungbo azühdokshitepba temenen agi kibongji semdang. Mezüngbuba Adami aibelenba ajanga temenen taittsüba nung alenbanger lia, iba taküm nungjagi alangzüksüba temedenba taküm ka ngudaktsütsü asoshi Tsüngremi taittsüba aser temedenba tsüngda apu ka ala aser aji "Khrista azüh".

Yisu Khriatai senti azüh tenlaba jagi taittsütepba temenenji shitoktsü aser Tsüngremi ain adoka temerenshi agütsütsü aliba nungi nisungi nüchi tia dangi anitetsü. Adianu, na temenen taittsüba süngrai kari alener ne sasa mekokteti ali asü? Arung aser Khrista züh ajanga shitoka temedenba takümüji agiang, süra iba nungjagi Kibubai na kümzüksü.

Sarasadem

Kibuba Yisu, Ne züh agi shitokja ni temedenba taküm ka kümdaktsüba asoshi Ne tenüng asanger. Amen

CNC-i May 22 nü sarasademtsü mepishir

Dimapur, Monupii/May 19 (TYO): Nagaland Joint Christian Forum (NJCF)-i mapang tetemsi nung state tesem ajaklen May 22, 2021 nü sarasademtsü ayongzüka atema parnok dang pelaba den külemba iba tayongzüka nungji ajemdaker Council of Nagalim Churches (CNC)-i brigades, battalions, units aser CNC kübok region Arogotem ajak nung NJCF-i

ayongzüka ama iba anogo nungji sarasademtsü metetdaktsür, ta Bodhbarnü CNC General Secretary, Ikato Chishi Swu-i sangdong ka ajanga metetdaktsü.

"Council of Nagalim Churches-isa denomination balala nungi Arogotem, sarasadem telok balala, sarasadem walunirtem, Nagalim nung alir Khristantem aser bendanglen alir Naga nung Khristan ajak dang shia aliba anogo nungji pei kiyong/tesem nung 'prayer walk' ayonga agitsü mepishir," ta CNC sangdong nung shia lir.

"Council of Nagalim Churches-isa, iba wara ajanga Nagalim nung joko tasüba malitsü, iba denji külemba iba tashidak keta alirtem ajak takoksang Yisu tenüng nung taneptsü angutsü atema June ita nung 'chain of prayer' ayongzüka agitsü mepishir," ta sangdong nung shia lir.

"Tang aliba wara yagi nisung shinga mebendanger. 'Anungji temenen kecha agia na matongtsü, mesüra nü süki anasa wara kecha marutsü' ta Tenüngsang Ken 91:10 nung shia aliba ama Tsüngrem tekümzüka kübok malirtem coronavirus wara agi meyoker. Tang ama mapang ka nung asen teimla aser tejenokdakji ajak takoksang Tsüngrem dang lir, aser asenoki sarasadema Pai melungba ama ali nung ang Pai kümzüksü," ta CNC sangdong nung shia lir.

Tenüngsang Ken 50:15 nung, "Aser timtemba angogo nung Kü dang jaang; Ni na kümzüksü aser nai Ni sentsüwangshitsütsü," ta shia aliba ama asenoki Kibuba dang tekümzüka meshidi aser ajak longjemer Pa sentsüwangshidaktsüba den külemba Pa nem tenüngsang agütsüdi," ta CNC-isa mepishia metetdaktsü.

Indonesia nung Tenla ki amakba ken o nung nisung 53 puogo



Taküm Palm Sunday (March 28) nü Indonesia kübok Makassar nung Sacred Heart of Jesus Tenla ki amakba sülen tangokba noksa nung angur.

May 19, 2021: Ita ana tejaklen Indonesia nung South Sulawesi province yimtiba, Makassar nung Tenla ki ka poksatsüba ken o nung Indonesia police-i nisung 53 tashi puogo.

May 18, 2021 nü osangbener den jembidang South Sulawesi police otongdar, E. Zulpan-i, taküm Palm Sunday (March 28) nü Sacred Heart of Jesus Tenla ki amakba nung shilem agiba atema May 18 nü tetsür 7 aser tebur 46 puogo, ta metetdaktsü.

March 28 nü Islamic State den sendaktepa aliba kiralongrar telok Jamaah Ansharut Daulah (JAD) network nung züngsem apuani nati taküm tenla agüja Tenla kiji bomb amshia amak, aser iba mapang nungji nisung 21 shi yirua liasü.

Tesüiba hopta ishika tsüngda police anti-terror squad Densus 88-i Central Sulawesi province kübok Makassar aser anasa aliba district kar nungi nisung 53 ji apu.

Zulpan-isa, Tenla ki amakba maparen nung parnokji Jamaah Ansharut Daulah (JAD) network yaria liasü, ta metetdaktsü.

Indonesia nung anti-terrorism özüng kübok parnok karbo küm 20 tashi-a tepuokdak ayutsüa akok, ta police otongdarisa metetdaktsü.

Iba Arogo nung putir, Wilhelmus Tulak-i, "Police-i aibelenertem apuba atema onok pelar, aser aibelenertem nem temerenshi agütsütsü," ta metetdaktsü.

Osangbener den jembidang Tulak-i, "Police nem iba ken o j u n g j u n g a bushisüngdangdakjang. Parnok nem özüng benokdakjang. Takoksa angurtemji özü Arogopur dang masü saka kü nüburtem lir. Joko iba ama ya kodanga matalokdaktsütsü," ta metetdaktsü.

March 28 nü Sulawesi asetkong nung Roman Catholic Arogo Tenla kidang Palm Sunday tekülem sentong tagidak mapang nung Tenla kima apuani nati temang nung bomb alenloker pokdaktsüba lendong nungji nisung aika yirua liasü.

Yaküm December ita nung Indonesia nung Jemmaah Islamiyah lenir, Aris Sumarsono

(Zulkarnaen) apuba sülen nungi tensa mejungi lia Tenla ki amak.

Putir, Tulak leniba nung Palm Sunday tekülem sentong agiba mapang 10:30 ako meta bomb lendongji ataloka liasü.

Bomb lendong atalokba mapang nung tekülem sentong mezüngbuba shilem nung adenertem Tenla kidang nungi ayazüka liasü aser tanabuba shilem nung adentsüpurtem Tenla kidangi toudak liasü, ta putiri metetdakja liasü.

Tawa kibong akümba apuani na motorcycle ka nung arur Tenla ki telung jagi aitsü merang saka security sepaitemi tena dak melung melemtetba agi nokdanga liasü; iba mapang nungji nisung ana rongnung jagi kati temang nung alenloka aliba bomb pokdaktsü.

Indonesia nung Muslim nung nütsüng timba lir. 2002 küm Bali asetkong nung nisung 202 pokseta asüba sülen nungi tenzuka linük nung kiralongrartemi kanga timtem agüja arudar.

Kiralongrartemi bendanglen nungi arurtem dak tenük yoka inyaker, iba denji külemba sorkar ketdangsertem, police, anti-terrorism forces aser nüburtem anema inyaker.

OLONG PAITEP # 5817

	1		2							3
4					5		6			
7										
			8							9
10									11	
								12		
13								14		
15										

TIPILEN		LANGTSÜNGLEN	
1. Taochi sayuba	- 10	1. Menungra	- 6
4. Temezüng agi kongshi	- 4	2. Mi tsükloker mesepba	- 4
5. Ainer	- 6	3. Süngo o tzü ajemba	- 5
7. Chiyungnü	- 3	5. Temenemsü tajung	- 7
8. Mi nung atsük	- 5	6. Idak	- 4
11. Asen masü	- 3	8. _____ ok	- 4
13. Lenmang ajurutepdak	- 6	9. Tebangi apuba kongki tapu ka	- 6
14. Yangi masü	- 4	10. Tashi endokba metet	- 5
15. _____ jang	- 6	12. Tzü manung senzüba	- 4

OLONG PAITEP # 5816 TELANGZÜBA

TIPILEN :		LANGTSÜNGLEN :	
1. Rebeka, 4. Adam, 6. Yohan,		2. Kan, 3. IM, 5. Anüng, 7. Amsü,	
9. Zü, 12. Sayutsüngir, 15. Ku,		8. Yosep, 10. Sara, 11. Isak, 13. Yakob,	
16. Naman, 17. Abel, 18. Samuel.		14. Nana, 16. Noa, 17. Am.	



ALOKBAR KIBONG NUNG SAYATENYA KA :

Alokba : Hai tetsü, na anüpongi kechiba papikaji yipden nungji amener? Hanna ama khuret kar aliasü?

Kinungtsü : Aya tejembino! yasüng pongmangbo tesüngmangtsü ka pongmangogono, Ena, pongmang nungji Anü O Itta na melangtepera ta Anüngjia chireper aludita see saw kanga sashia asayar, yamaji mapang talangka melangteper kelen tesüsa Anüsa tolubaji Anüi koker Ittaji Alimai tsüka pongmangogo, aji kechi tetezüarna?

Alokba : Tetsü aji kecha masüako, Ena! tangar kibong tajung kar asü nungbo remso asütsü pongmangaago, saka asenbo yamaji masü kechiaser asen kibong nungbo naang kinungbo kümer naidang kibong ajunga ajetreper Amdi ta yimsü asüdang mapang shia ana melangteper masüna? saka tatem nungbo nisa koker anenli ta asüba ya koda! komar ka süaka teburji tebur, tetsürji tetsürsa asütsüako no !!!!

Kinungtsü : O Kinungbo Alokba!!!!
Lilir : I. Kilang Ajem, Indisen, Dimapur.

AO OSHI ANGAZÜKDAK:
TANÜ ANGAZÜKTSÜBA OJANG

Jakma
(v) long ama temerang oset raksaba (breaking stone like hard object)
* Long manung mi apuba agi longji ana küma **jakma**.

Jakpu
(adj) topur ajung indang onsara bilemba (stylish)
* La kanga **jakpu** agi aikati la maginer.

Happy Birthday

TENÜNG : SANENTI OZUKUM
Tasoba anongo : 19/05/2020
Talidak : Ward 10 chumukedima
Küm : 1
" HAPPY BIRTHDAY SANENTI "
Tsüngremi maneni arishi talang moajang ma.
- Temiem : Oba, oja

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

TANÜBO NAI LANGZÜANG

Q. Tawa Professor MS Narasimhan alima nungi pila-a ogo, süra pa ya kobala nisung ka liasü?
a) Physics b) Mathematics c) Textile d) Design Architecture

_____ (Taruba adok nung onoki langzüsü)

YASHI ADOK TELANGZÜBA : Indian Institute of Technology, Ropar

SUDOKU # 5860 TELANGZUBA # 5859

	2			6				4	2	9	8	7	3	5	1	6	
	3	6				7	9		3	5	6	2	1	9	8	7	4
	7	1			8			6	1	8	7	5	6	4	2	3	9
		8	7	5	3		1	4	5	9	4	3	2	8	1	6	7
3	4			8					7	6	8	9	5	1	4	2	3
		5	6	9	4	8	7	3	2	3	1	7	4	6	9	8	5
9		3	5			6			6	1	2	4	9	7	3	5	8
7	5		2		1			8	9	7	3	1	8	5	6	4	2
1			8	3	9			7	8	4	5	6	3	2	7	9	1

OJANG LUTEP # 5403

CKDLOOWN :

PAMANG :

SUNNIG :

IKAA :

IPE :

PAMA :

ETNYAMEIKTI :

SHBULUISAA :

TEMTIMA :

ÜRKAZ :

OJANG LUTEP TELANGZÜBA # 5402

TEPOR TAJUNGBO AJAKI REPRANGNER ASER SEMPET
JUNGA AMSHITETERBO AJAKI SAPUR

TAN HOPTA ATEMA - KOMA SÜLA ?

Q. Covid mozü kidang inyaker doctor, nurse aser staff-tem asoshi anogo shia chiyongtsü mozü ki anasa aliba arogotemi longjemer agütsü nunga koma süla ?



Mumbai, May 19, 2021: Arabian tzyüim nung Cyclone Tauktae ajanga rong ka tsükokba lendong nung Indian Navy temi kumzükertem Indian naval rong- INS Kochi ajanga Mumbai atongba sülen rong nungi aluba noksa nung angur.

Cyclone Tauktae süngjemdar; state aika nung tzunglu arutsü

New Delhi, Monupii/May 19

(Agencies): Bodhbarnü India Meteorological Department (IMD)-i, cyclone Tauktae tashi maitba kümdar aser Bodhbarnep tashi nung south Rajasthan aser Gujarat region nung liasü, ta metetdaksü.

IMD-isa, iba yipru ajanga Gujarat tesem ajaklen tzunglu aruba sülen maneni Rajasthan, Uttarakhand, Himachal Pradesh, Uttar Pradesh aser Delhi densema state aika nung tzunglu arutsü, ta metetdaksü.

Iba yipru ya tang Rajasthan kübok Udaipur nungi kilometer 60 shi aser Gujarat kübok Deesa nungi kilometer 110 shi pilar lir, ta Bodhbarnep IMD-i

metetdaksü. Iba yipru ajanga maneni taruba ghonda 24 tsungda Uttarakhand nung tzunglu arutsü, Himachal Pradesh, Haryana, Chandigarh, Delhi, Uttar Pradesh aser Rajasthan state tem nung tzunglu arutsü; taruba ghonda 12 tsungda anüdoklen Rajasthan aser Gujarat region nung mopung ghonda ka nung kilometer 45-55 kera aontsü, ta IMD-i metetdaksü.

Mongolbar nung 1:30 ako meta cyclonic Tauktae ya Gujarat kübok Saurashtra region nung Diu aser Una na tsungda süia liasü.

Iba yipru ajanga Gujarat

nung nisung 13 asü, aika yiru, süngdong den light indong meyirjang aika lao aser ki aika raksaja liasü.

Mongolbar aonung osangbenertem den jembidang Gujarat Chief Minister, Vijay Rupani-i, taruba anogo ishika tsungda teraksatsübatem yanglushitsü, ta metetdaksa liasü.

Iba yipru ajanga tamajungba kongshiba district temji Amreli, Gir Somnath, Junagadh, Porbandar, Rajkot, Bhavnagar aser Botad district tem liasü aser state kübok yim 5,951 tashi nung light marur.

State nung light indong 70,000 shi lao aser 220-KV sub-station pezü raksatsü.

West Bengal Angh, Jagdeep menden nungi agientsüla: Shiv Sena

Mumbai, May 19

(Agencies): West Bengal nung Angh, Jagdeep Dhankar-i state nung yimtenren tashi meitdaksütsü meranger, anungji pa tangsa Angh menden nungi agientsüla, ta Bodhbarnü Shiv Sena-i takhangba agütsü.

Tang West Bengal nung TMC-i aniba sorkar aser opposition BJP na tsungda yimtenren tsütsü aitsütepba mapang nung Shiv Sena-i, Angh-i linük temzung alema

inyaksangshir, ta aitsü. "Sorkar tashi meitdaksütsü aser state nung mepetmesü adokdaksütsü atema meranger. Tangsa Angh agientsüla," ta Shiv Sena-i takhangba agütsü.

Tawa West Bengal election matongdang Shiv Sena-i Trinamool Congress (TMC) tongti lenir aser chief minister, Mamata Banerjee pusema liasü.

Narada ken o nung yakünü CBI-i TMC lenir pezü apuba ya yimtenren tsütsü

mangyangba lir, ta Shiv Sena-isa metetdaksü.

"2014 küm Narada string operation mapang nung parnoki sübokrem agiba video tangoka liasü. Ajisüaka kechiba iba ken o nung tai tonglokja alir ana aser tang BJP nung dena alir- Mukul Roy aser Suwendu Adhikari na anemabo meinyak? Tena tangbo BJP nung adenba aser Mamata Banerjee anema election nung toktepba ajanga tenabo aibelen nungi merükteter asü?," ta Shiv Sena-isa aitsü.

India nung ano nisung lakh 2.67 dak Covid putet aser 4,529 asü

New Delhi, May 19

(Agencies): India nung ano nisung lakh 2.67 dak coronavirus tashidak putet aser iba tashidak agi shiranger 4,500 dak tema asü; linük nung iba wara prok tenzüker tang tashi nung anogo ka kija nung coronavirus agi nisung timtiba asübaji tesüiba ghonda 24 tsungda nisung 4,500 dak tema asüba ya asütsü.

Tesüiba ghonda 24 tsungda India nung nisung 4,529 coronavirus tashidak agi asü aser tang tashi nung iba tashidak agi asür ajak senteperbo 2,83,248 jungogo, ta Bodhbarnep Union ministry of health & family welfare-i metetdaksü.

Tesüiba hopta ka tashi anogo shia linük nung coronavirus tashidak agi nisung 4,000 dak tema asür; May 15 nü ang iba tashidak agi nisung 3,850 asü.

Linük nung ano nisung 2,67,334 dak coronavirus putet aser ibaji densemabo tang tashi nung nisung ajak agi 2,54,96,330

dak iba tashidak puatetogo.

Bodhbarnep Indian Council of Medical Research (ICMR)-i, May 18, 2021 tashi nung samples ajak agi 32,03,01,177 tendangogo, aser iba nungji Mongolbarnü samples 20,08,296 tendangba densema lir, ta metetdaksü.

WHO-i ashiba agi, tang anogo shia coronavirus case 15,000 dak tema putetba linüktemji India (tesüiba anogo ka nung case 2,67,334), Brazil (Covid case 40,941), US (17,984), Argentina (16,350) aser Colombia (15,093) linüktem dang lir.

Alima nung coronavirus case ajak senteper million 163.9 jungogo aser iba tashidak agi asür million 3.39 jungogo, ta Johns Hopkins University-i metetdaksü.

Alima nung coronavirus agi tamajungba kongshiba linük ji US lir (Coronavirus case 32,996,565 aser asür 587,199), iba sülen tanabuba linükji India lir.



Jammu, May 19, 2021: Jammu nung curfew mapang gari lenmang nung coronavirus atema tekümdangtsü o zülur aliba anasa police ka süia aoba noksa nung angur. India nung nisung million 25 dak coronavirus putetogo aser iba tashidak agi nisung 2,83,248 süogo.

Ato kilonser Modi-i kechiba Gujarat state kija semdang?: NCP

Mumbai, May 19

(Agencies): Bodhbarnü Maharashtra nung Maha Vikas Aghadi (MVA) teloktep sorkar nung densema aliba party- NCP-i, Cyclone Tauktae ajanga Maharashtra state-a kongshiogo, ajisüaka kechiba Ato kilonser, Narendra Modi-i Gujarat aser Diu dang semdanga survey agi, ta asüngdang.

Shiv Sena MP, Sanjay Raut-i, Ato kilonseri Maharashtra nung cyclone agi kongshiba tesemtem nungo survey magi, kechiyong par state Gujarat ama masü saka Maharashtra nungbo tashitait chief minister ka lir, ta pai angateta lir, ta ashi.

Bodhbarnü Ato kilonser Bhavnagar (Gujarat) tonga aruba sülen helicopter nungi cyclone agi kongshiba Una, Diu, Jafarabad aser Mahuva tesemtem repranga survey agia liasü.

Survey agiba sülen pai Ahmedabad nung review senden ka ayongzüka amen.

Maharashtra nung minister aser NCP otongdar, Nawab Malik-i twitter ajanga, "Tanü Ato kilonser Modi-i Daman, Diu aser Gujarat nung #CycloneTauktae agi kongshiba tesemtem semdang. Kechiba

Maharashtra nung cyclone agi kongshiba tesemtembo mesemdang? Iba ya bendanga züngshiba masü no?" ta asüngdanga liasü.


NCP ya Maharashtra nung Shiv Sena-i aniba teloktep sorkar nung densema lir.

Iba cyclone Gujarat matongdang Maharashtra nungbo tzyüimkümlen tesem aika kongshir liasü.

Osangbener den jembidang Raut-i, "Ato kilonseri tayimtsü nungi Maharashtra nung cyclone ajanga teraksatsübatem masadanger, kechiyong state nung tayongzüka ajak koktettsüsa tashitait lenir (chief minister) Uddhav Thackeray lir, ta pai angateta lir," ta ashi.

Shiv Sena MP-isa anemsü agi, iba cyclone ajanga state aika kongshiogo, saka Ato kilonseri Gujarat dang semdangba atema pai aitsütsü menüngdak, ta ashi.

"Ato kilonseri par state semdang, kong tashimait sorkar lir aser iba cyclone ajanga teraksatsüba tulu liasü. Ajisüaka kasa cyclone agi Maharashtra aser Goa-a mejungi kongshiogo," ta Raut-i metetdaksü.



May 19, 2021 nü Dhanbad district (Jharkhand state) nung police-i coronavirus anema tetuyuba alema inyaker lanur kar nem temerenshi agütsüba noksa nung angur.

Malawi nung COVID-19 mozü aika rongdok

Lilongwe, Monupii/May 19 (Agencies): Malawi nung health ketdangsürtemi AstraZeneca coronavirus mozü mapang süyir aliba doses 19,610 rongdok aser nübür nem mozü tajung dang agütsütsü, ta ashi.

Africa nung yimjak nung iba ama mapa inyakbabo Malawi ya mezüingbuba alitsü.

World Health Organization ajanga mezüingbo linük balala dang mapang süyir (expired) aliba mozü ya mindoktsü ashi saka tangbo parnokki ajungshiba yimya melenshiogo.

Malawi nung iba mozü agir kanga ajema lir aser health worker temi iba ama mapa inyaka sayuba ajanga nübürtemi mozü nung temolung alemtsü imlar.

Nütsüing yongsük million 18 shi aliba Malawi linük nung coronavirus ya nisung 34,232 dak jangjateta lir aser nisung 1,153 siogo.

March 26 nü African Union nungi Malawi nem AstraZeneca mozü dosen 102,000 agüja liasü aser item mozü ya shilem 80 shi amshio.

Saka mozü 'expiry date' ya April 13 liasü, anungji 'cold chain' nungi agizük.

"Anogo süyir aliba mozü lir ta osang prokshia aodang nübürtem mozü agitsü maru, ta

Malawi indang Principal Health Secretary, Dr Charles Mwansambo-i ashi.

"Onoki mozü ya merongdokra onoki mapang süyir aliba mozü amshir ta nübürtemi bilemetsü aser parnok mozü agitsü marura COVID-19 agi kanga mejungi kongshitsü."

Taoba mapanga mozü ya indokogo, ta pai ashi.


Bodhbarnü Malawi indang Health Minister Khumbize Chiponda-i mozü arongba tesem shibangba noksa nung nguogo.

Malawi yimtiba, Lilongwe nung nisung kar mozü ya agitsü tsüpua bilemer.

"Mozü agir azü telong adenba mesüra kar mozü agir asüba osangtem ni angashia lir. Parnoki tiazü ashir asü? Mesüra ochi asünungbo, kechiba parnokki asenok nem mozü kasa agütsür?" ta iba yimti nung dokan kibur kati asüingdang.

AstraZeneca mozü ajanga azü telong adenba indang tesendaktep kuli nguteta mali, aser health tsütsü takotet nisungtemi akok tashi mozü ya agitsü ajungshir.

Tang amshiba danga COVID mozütem ya ita 36 tashi amshiteter. COVID-19 mozü amshi tenzüker küm ka majung, anungji mozü tejentemi mapa inyakba indang masadanteti lir.



Morocco aser Spain na arrtsü anasa Spain tsütsü Ceuta nung sepaitemi nüka alidak tükum nung Morocco nungi timba sür nisungtem nokdaka aliba noksa ka yangi angur. Mangatetep kar adoka Rabat-i arrtsü anükba salaba sülen migrant meyerijang aika Europe leni aruba ngua Spain-i mitkartem Morocco arrtsüleni yok.

Taoba Italy Ato Kilonser Berlusconi kanga shiranger

Milan, Monupii/May 19 (Agencies): Taoba Italy Ato Kilonser Silvio Berlusconi kanga shiranger aser tenük kuli alir nem süpokrem agütsüba ken o khen atema mejembi alitsü, a ta Milan nung obendanger kati Bodhbarnü ashi.

Arishi küm 84 tain Berlusconi ya taoba küm September ita COVID-19 agi menepba sülen taküm mozüki len kanga senzür aser pa temang tamajungba akumer südi, ta nübürtemi temolung melemer.

"Berlusconi kanga mejungi shiranger aser tashidak tamajung agi timtemer ta amanger. Medical kaket aser shisa

agitepba nung yamaji sayur," ta prosecutor Tiziana Siciliano-i ashi.

'Ruby' ta tenüing jalokja alila tetsür tain makum ka den Berlusconi shi nung medemba ken o nung pa medenja lir saka iba dak sendakba ken o ka jembiba mapang, Berlusconi ya tang atema okadaki mejaoktsüla, ta Siciliano-i ashi.

May 26 nü ano pa indang ken o jembitsü aliba mapang Berlusconi ya okadaki jaoktsü asü masü ta obendangeri telemteba agitsü.

Pezüben tashi Italy ato kilonser inyaksang ya tekep ayoker tanur den shi nung

medemba tenük kuli alirtem ola madoktsü asoshi süpokrem amshi ta tai tonglokja 2013 küm nungi ken o jembia arur. Sapa paibo aibelen mapa meinyak, ta nokdaka arur.

Pa ya Milan nung aliba San Raffaele Hospital nung anogo pongu munger Honibarnü alu. Pa ma mozüki nung March ita khen aser April ita anaben munga liasü. Temolungjang nung timtem aliba mechi pa January ita mozüki nung munga liasü.

"Pa kidanga doctor temi temang anepalur. Hao onik kanga shisapalur," ta Berlusconi indang okatsür Federico Ceconi-i osangbener dang ashi.

Israel-i Gaza maneni amaker; ceasefire teimla mangur

Gaza City, Monupii/May 19 (Agencies): Israel indang fighter jet temi Gaza Strip nung Bodhbarnepa maneni maka nisung aliba ki raksatsü aser osangbener ka dena Palestine nung pezü takum samatsü.

Palestine nung teloktemi Israel south tsütsü aliba yimtittem nung rocket tali khaloktsüba mapang Israel-i tang tesüsa amaker. Nisung yiruba osangbo meliasü.

Aji masüdang occupied West Bank aser East Jerusalem nung longkak aitba mapang Israel sepaitemi Palestine nung pezü kaset aser aika yiruja liasü.

Gaza nung May 10, 2021 nü azüdokshi tenzüker tang tashinung tanur 63 densema Palestine nung nisung 219 shi takum samaogo. Palestine nung nisung 1,500 shi yirur lir. Israel nunga nisung 12 süogo, aser yangji tanur ana dena lir, aser Israel nung nisung 300 shi yirua lir.

Azüdokshi tenzüker anogo ter buba nung mejaklokaka Israel aser Gaza yimsüsür Hamas nungertem tsüingta yimjung ken o jembitsü asoshi diplomats temi merangba nung takok anguba mali.

Rara anentsü ajungshia UN Security Council ajanga sangdong magütsüdaktsütsü atema United States-i maneni nokdaker aser yimjak nung osang sangdongba ajanga tensa tajungba makumtsü, ta ashir.



Gaza nung Israel nungeri azüdokshiba anema Mississauga, Ontario nung Palestine bukumertem adenshia longkak aitba mapang tangokba noksa nung angur.

Saka France-i Israel kidanger Egypt aser Jordan den ceasefire temzüng tasen ka atema inyakteptar, ta ashir. China-ia France sentong nung yariteptsü shiogo.

Arishi küm 15 tain Islam Wael Bernat aser arishi küm 20 tain Adham al-Kashef na tasüming West Bank kübok al-Bireh yimti nung remogo.

Palestine nung aliba litsü ajunga nung Mongulbarnü longkak aidak adenba mapang Israel sepaitemi Palestine nung pezü tepsetba nung tena ya densema liasü.

Gaza nung Palestine sepaitem anema tayimtsü amshia raraba anentsü temsüa ali asü masü ta Israel-i

asadanger saka nüngdakra ano anogo aika amaktsü renemer, ta Israel mitkartemi sangdong ka nung ashi.

"Ceasefire atema mapang tetemsü ka bushir," ta osang ka ajanga ashi. Gaza nung Hamas yimsüsürtem tashi ajemdaktsütsü nükjidong atalok asü masü ta Israel-i asadanger, ta ashi.

Gaza City north tsütsü Al-Amdalus tower nungi Palestine nung kibong ter dak tema ainshidaktsüogo. Al-Amdalus tower ya storey 16 aliba ki ka lir, aser yangji Israel-i tayimtsü amshia amaktsü akok, ta osang arua liasü.

Yasüing Israel nung Palestine senso 58 apu, ta Legal Center

for Arab Minority Rights in Israel (ADALAH) ajanga ashi.

Gaza nung Israel-i tayimtsü amshia amakdang nisung pezü tepset, Khan Younis jila nung youth centre ka raksatsü aser Rafah nunga charity centre ka raksatsü, ta yangji alirtemi ashi.

Gaza City anüdoklen Radwan nung Palestine nung pezü tepsetba rongnung osangbener ka lir aser kibong ka nungi kinungbo, kinungtsü aser jabaso ka alitsü.

Al-Astal kibong nungi züingsemtemi ashiba agi, yasüing ki tenet raksatsü aser bomb pokloktsütsü minute pongu lia warning missile ka khalokja liasü.

Tang tashinung Israel

nungeri tayimtsü amshia amakdang Gaza nung school 50 tashi raksatsüogo aser yangji tanur 41,897 dak kongshir, ta Save the Children ajanga ashi.

Maneni Gaza nungi Israel nung rocket khaloktsüba mapang yangjia school pezü raksatsü, ta UNICEF ajanga ashir.

Gaza nung nisung meimchir timtem ajuruba asoshi UNRWA kanga shisabulur aser tangsa Beit Hanoon aser Karam Abu Salem crossing lapokjang, ta ajungshir.

Iba crossing ana ya lapokba ajanga security officer, trauma coordinator aser timtem nung alirtem atema teyari balala bener otettsü.

Palestine nung alidak COVID-19 tebilemetsü khuret agi sünger lia tang rara yagi tensa tamajungba kumdaktsür. "Nübürtem telok tulu jenokdak bushiba ajanga tashidak wara tsütsü tamajungba kumdaktsür: tawa Gaza aser West Bank nung COVID-19 kanga sashia jateta lir," ta UN agency for Palestinian refugee ajanga sangdong ka nung ashi.

Occupied West Bank nung Israel police temi Palestine nung longkak aiter 21 puogo, ta Wafa news agency ajanga ashi.

Hebron yimti nung nisung asem apu, Nablus nung asem apu, Jenin nung asem aser Bethlehem nung pezü apu, ta osang ajanga ashi.

Tening Sub-Divisional Task Force senden menogo

Dimapur, Monupii/May 19 (TYO): Covid-19, Tening Sub-Divisional Task Force senden ka ADC aser Sub-Divisional Task Force, Tening mendenbuba Rosietho Nguori lenisüba nung May 19 nü menogo. Iba senden nung Arogo lenirtem, GB aser Tening jila aser Tening yimtsüing chairmen dena liasü.

Senden nung teküboklen agüja aliba onük tem lemteta liasü:

1. Tekülem senpet shibangtsü: Tening Sub-Division kübok denomination/tamangba ajak indang tekülemdak/temple ajak sub-division mokdang aliba mapang shibanga atatsü.

2. Sub-division maneni shibangtsü: Sorkari state

mokdanga yur aliba matsülangtsüyonga Tening Sub-Division bo May 31, 2021 tashi mokdanga ayutsü senden nung lemtet.

3. VTF/WTF tenzükshir: Covid-19 wara ajanga bener arutsüba tensa tajungtiba nung azüoktetsü atema yimtsüing/wards nung Village Task Force (VTF) aser Ward Task Force (WTF) tenzükshitsü aser metetet lira tentetsü.

4. Dokan lapoktsüba mapanglem: Tenüngdakba oset ayokba dokantem anepdang 6:00 nungi anüngdang 12:00 ako tashi lapoktsü melatsü.

5. Check gate khen atema lapoktsü: Tening Police-i,

temelaba magütsü aliba nisung aser gari senzüsenpong azüoktsü atema tongtibang tesem kar nung khen atema check gate amenoktsü.

6. Senden nungsa ADC office, Tening ajanga tenüngdakba o s e t / s e r v i c e senzüsenpongtsü atema temelaba agütsü. Kasa mapang nung yimtsüingtem nungi Tening jila-i tenüngdakba oset alitsü aser maparen balala arurtem arurtem pei village council nungi tezüluba nung temelaba bener arutsü.

Senden nungsa BPM, Khengpi-i, Tening Sub-Division nung vaccine agütsüba sentong indang lemsatepa liasü.

Longleng DC-i metetdaksür

Dimapur, Monupii/May 19 (TYO): Nüburtem kümzüka toktsütsü atema aser SBI, Longleng nung mapa inyaker dak Covid-19 tashidak potetba sülen DC &DTF Chairman Longleng, Shayung Phom-i, State Bank of India, Longleng May 18 nungi May 31 tashi shibanga atatsü tetuyuba agütsüogo.

Tashidak prokshia aoba nokdangtsü aser contact tracing asütsüba den office merektetsü atema iba jenjang agitsü kanga nüngdaka aküm.

Osang tejangja ka magütsü tashi tenokdangba agütsür aliba mapang tepeyong bank nung inyakyim ajak shibanga atatsü, ta DC-isa nüburtem nem metetdaksüogo.

Allu Arjun-i par staff tem vaccine agitsü anepalutsü



Monupii/May 19, 2021

(Agencies): Telugu nung nüngtugu actor Allu Arjun, shiba tawa Covid-19 agi shiranga aliba anepogo, pai pa indang staff shirnok arishi küm 45 ajanger lir parnok ajak aser parnok kibongtem atema vaccine agitsü anepalutsüogo.

Staff tem vaccine agiba inyakyim temelaba küm daksütsü atema actor yagi inyakyim ajak anepalutsü liasü.

"Arjun-i pa kübok inyakertem ajak par kinunger ama dang anepalua arudar aser pai mera talila ka agia pa kübok inyaker arishi küm 45 temapurtem aser parnok kibongtem vaccine agitsü atema anepalutsüogo," ta source kati ashi.

Allu Arjun dak April ita Covid-19 tashidak potet aser pa kidang quarantine süa liasü.

Kasa mapang nung Arjun action-drama movie Pushpa nung shilem agiba angutsü, kong Rashmika Mandanna-i tetsürtem rongnung tongti

shilem agitsü aser Malayalam actor Fahadh Faasil-i antagonist shilem agitsü. Pa sor küm 38 ajungba nü Arjun-i movie nung pa indang character terprangtsü tasen ka sayua liasü, kong pa bike ka nung tola temesüing ka aser blue denim jeans den tenük aina tanak ka semer aliba agnitsü. Iba movie ya August 13 nü theatre nung sayatsü.

Film ya Telugu, Tamil, Malayalam, Kannada, aser Hindi oshi nung sayatsü, koba red sandalwood shibelenba indang asütsü. Poster ajanga Arjun-i nisung tesashi ka indang shilem agitsü ama reprangtetogo, shibai anir ochi mashi inyakyim anema nokdaker.

Pushpa film ya Sukumar B-i direct asü aser Devi Sri Prasad-i film nung music tem mejemtsüogo. Arjun-i taoba mapanga iba film yanglur aser music composer den Arya aser Arya 2 nung külemi shilem agiogo, koba 2004 aser 2009 küm sayaogo.

Triple Rear Camera aketba Vivo Y52 5G sayaogo



Monupii/May 19, 2021

(Agencies): Vivo company-i asendenshir Y-series nung Vivo Y52 5G sayaogo. Iba smartphone nung MediaTek Dimensity 700 SoC inokja lir koba smartphone dalang nung 5G connectivity agütsütsü atema designe süa yangluba lir.

Iba phone nung aliba kasa processor ya Realme 8 5G nunga keta lir, koba India nung sen 13,999 agi tenzükter yokdar. Vivo Y52 5G ya tangbo Europe nung shishilembadak dang ngudar aser alima ajunga nung kodang sayatsü iba indang osang tejangja mali. Vivo Y52 5G nung tesülen camera asem ya rectangular module ka telung

nung inokja aliba angutsü. Screen nung selfie camera keta aliba waterdrop-style notch ya feature tem rongnung tongtibang ka asütsü.

Specifications dak sendakba nung Vivo Y52 5G nung 6.58-inch IPS LCD display den Full-HD+ resolution, 20:9 aspect ratio, aser screen-to-body ratio of 90.6 percent keta lir. Phone nungsa octa-core MediaTek Dimensity 700 SoC den 4GB RAM aser 128GB internal storage inokja lir, koba maneni atsülanga amshitetsü.

Iba smatrphone nung operating system ji Android 11-based Funtouch OS out-of-the-box asütsü aser SIM card ana

inoka amshitetsü. Tesülen camera asem inokja aliba rongnung 48-megapixel primary camera ka, 2-megapixel macro sensor ka aser 2-megapixel depth sensor ka densema lir. Tejaklen selfies aser video calling atema 8-megapixel camera ka inokja aliba angutsü.

Vivo Y52 5G nung tanga tongtibang feature tem rongnung 4G VoLTE, 5G, WiFi 802.11 b/g/n, Bluetooth v5.1, GPS + GLONASS, 3.5mm headphone jack aser fingerprint sensor ka densema lir. Iba device yagi security atema face unlock dena support asütsü. Iba Vivo phone nung ya 5,000mAh battery ka keta lir aser iba ya USB Type-C charger ka ajanga 18W fast charging dena support asütsü. Vivo Y52 5G ya Graphite Black aser Dream Glow sentsü nung angutsü. Company-i tang tashi nung phone jenjang tejangja agüja mali.

Temetetsükaji Vivo Y52s aser Vivo Y52s (T1 Version) ya China nung tang CNY 1,598 (approx Rs 18,100) aser CNY 2,099 (approx Rs 23,900) agi ngudar. Phone anaprongla ya India nungbo mangur.

Vaio Z India nung sen 3,52,990 agi sayaogo

Monupii/May 19, 2021

(Agencies): Japanese tech company Vaio-i India nung Vaio Z laptop sayaogo, koba "a 3-D moulded," carbon fibre body aketba mezüngbuba notebook asütsü. Carbon fibre body ya kanga tepongba aser raksatsü melara masü koba taoba mapang nungi car racing industry nung amshia arudar.

Iba laptop ya Amazon ajanga angutsü, kong 14-inch 4K display den Dolby Audio-enabled speakers keta lir aser tozük seret 1 asütsü. Laptop nungsa 11th-generation Intel Core processors aser integrated Intel GPU inokja lir. Vaio Z ya Nextgo-i lemshitsü. Iba company yagi linük nung Avita laptop tem yokdar. Iba device nung mezünyonggi taküm

tepeyong atema Windows 10 Pro keter arutsü.

Design dak sendakba nung Vaio Z ya sentsü tanak nung angutsü aser "ergonomic hinge" ka keta lir koba ajanga screen 180 degrees meyipa amshitetter. Iba laptop nung 14-inch Ultra-HD (4K) LCD display ka den ajaklen slim bezels keta aliba angutsü. Laptop nung 11th-generation Intel Core i7-11375H CPU aser Intel Iris Xe GPU keta lir aser iba den 32GB LPDDR4 RAM aser 2TB SSD storage inokja aliba angutsü.

Connectivity options tem rongnung USB Type-C ports ana keta lir aser iba ajanga Thunderbolt 4, HDMI, Bluetooth 4.1, aser headphone jack ka support asütsü. Tesasatsükaji iba

ultra-premium laptop yagi internet connectivity atema old-gen dual-band Wi-Fi dang support asür.

Laptop nung tanga tongtibang features tem rongnung facial recognition, fingerprint reader, bios authentication, 53Wh battery densema lir. Iba battery ya khen charge asü nung ghonda 10 amshitetsü. Maneni laptop nung security atema webcam ya cover keter angutsü aser sound temerek agütsütsü atema Dolby Audio speakers inokja lir.

Vaio Z ya sen 3,52,990 agi angutsü aser Amazon-i ita shia sen 16,616 nungi tenzüka standard EMI payment option, card kar amshia aliba mapang jenjang ajemer agütsüba den exchange offer dena agütsütsü.

Marvel Studios-i Thomas aser Selim na anik

New York, Monupii/May 19, 2021

(Agencies): Samuel L Jackson-i tongti shilem agitsü aliba series - 'Secret Invasion' atema Marvel Studios-i film yanglur Thomas Bezucha aser Ali Selim naprongla anisemogo.

Tawa, Bezucha-i anir nüngtugu actor Kevin Costner aser Diane Lane na indang thriller film - 'Let Him Go' yangluogo. Kasa mapang, Hulu series - The Looming Tower indang episode ana atema Selim-i director ama inyakogo.

Marvel Studios president Kevin Feige indang taruba show zülutsü aser executive producer ama inyaksü atema Kyle Bradstreet anikogogo.

Secret Invasion nung Jackson-i Marvel Cinematic

Universe (MCU) franchise nung inyakba ama Nick Fury den külemi shilem agiba angutsü. Captain Marvel nung Talos ama shilem agisang Ben Mendelsohn den Jackson longjemtsü.

2008 küm adokba comic otsü nung ajemdaker iba series yanglutsü. Iba series nung shape balala melenba alien - Skrulls telok kati meimchir rongnung densema maparen ka metetsü atema nisung akümba aser küm ishika lir superhero agi melenba indang otsü sayatsü.

Secret Invasion cast rongnung Oscar takok angur Olivia Colman, Game of Thrones actor Emilia Clarke aser 'One Night in Miami' actor Kingsley Ben-Adir nunger dena lir.

FIFA World Cup Qualifiers atema India squad sangdongogo

Monupii/May 19, 2021 (Agencies): Züngsem 28 agi kümtetba Indian National Team squad May 19 nü nikongtsütsü Doha-i ogo. Parnok June 3 nü nungi tenzüka FIFA World Cup Qatar 2022 aser AFC Asian Cup China 2023 Qualifiers atema asaya asem nung shilem agitsü.

Qatar-i aotsü atema senzüsenpong dak sendakba nung latetja aliba ama asayar aser staff tem ajak ket nung RTPCR tests ajanga anguba negative test results bena lir, koba taoba ghonda 48 tsüingda agia liasü. Parnok ajak ya May 15 nü nungi hotel ka nung lokti nungi pilar liya liasü. Stimac-i ashiba agi, June nung qualifier asayatsü lia tensa kanga junrarabo masü ajisiüaka asaya metenzük tsüingda Blue Tigers team-i kanga meranga inyaktsü.

"June nung qualifier asayatsü lia tang tensa kanga junrarabo masü. Wara pokteter aliba ajanga May tetenzüklen Kolkata nung agitsü aliba National Camp-a athitsüsa aküm. Wara pokteter ajanga Dubai nung friendly match ka asayatsü aliba dena athitsüsa aküm," ta Head Coach-i ashi.

"Ajisiüaka onoki tensa angateter aser asaya atema renema atatsü asoshi talila inyaktsüsa aküm, kong Asian Champions Qatar den Doha

nung mezüing asayatsü lir," ta Stimac-i ashi.

India team Asian Champions Qatar den June 3, Bangladesh den June 7 aser Afghanistan den June 15 nü asayatsü. Asaya asemprongla Jassim Bin Hamad Stadium, Doha nung asayatsü. Camp atema shimba asayar 28 rongnung Glan Martins kija tang mezüingbuba National team camp atema shimogo.

Kasa mapang nung National Team captain Sunil Chhetri-i team nung tanaben densembe atema anisüingzükba lemsatepogo. "National team squad nung tanaben densembe ya anisüingzük ka lir. Doha nung oa asayatsü atema kanga yongyaa atar. Ni tatemsa Doha nung Qatar den asayaba asaya nung shilem magitetsüsa aküm, kechiyong ni temang manemi liasü," ta Sunil-i ashi, shibai International goal 72 idaktsür lir.

"June nung asayatsü aliba asayatem ya kanga melarabo masütsü aser onoki khen nung asaya ka atema dang bilema asayatsüla. Mapa mali asünung preparatory camp ajanga mezüingbuba asaya nung shilem magi tsüingda onok longjemer asayatsü atema teyari agütsütsü," ta pai ashi.

Covid wara pokteter aliba ajanga teti asayaa aruba ama home aser away asayatem masaydaktsür saka Doha nung

dang asaya ajak asayatsü. Group E nung India team-i asaya asem nung point asem nguteter lir.

Domestic season tembangba sülen Senior National Team taküm küm tetenzüklen Dubai nung camp ka agiogo aser iba sülen Oman aser UAE den FIFA International Friendly ana asayaogo.

INDIA Team FIXTURES

June 3: India vs Qatar (IST 10.30pm).

June 7: Bangladesh vs India (IST 7.30pm).

June 15: India vs Afghanistan (IST 7.30pm).

Squad:

GOALKEEPERS:

Gurpreet Singh Sandhu, Amrinder Singh, Dheeraj Singh.

DEFENDERS:

Pritam Kotal, Rahul Bheke, Narender Gahlot, Chinglensana Singh, Sandesh Jhingan, Adil Khan, Akash Mishra, Subhashish Bose.

MIDFIELDERS:

Udanta Singh, Brandon Fernandes, Liston Colaco, Rowlin Borges, Glan Martins, Anirudh Thapa, Pronay Halder, Suresh Singh, Lalengmawia Ralte, Abdul Sahal, Yasir Mohammad, Lallianzuala Chhangte, Bipin Singh, Ashique Kuruniyan.

FORWARDS:

Ishan Pandita, Sunil Chhetri, Manvir Singh.

AIBA-i Asian Boxing Championships atema senpet USD 400,000 sangdong



Monupii/May 19, 2021 (Agencies): International Boxing Association (AIBA)-i Mongolbarnü Dubai nung asayatsü aliba taruba Asian Championships atema senpet USD 400,000 agütsütsü sangdongogo.

Iba asayamung ya mezüingbo India nung May 24 nü nungi tenzüka asayatsü lateter liasü, ajisiüaka India nung COVID-19 tensa kanga mejungi akümba ajanga Dubai-i belener ao. Iba asayamung nung tetsür aser tebur naprongla asayatsü.


"Tetsür aser tebur asaya nung boxer shirnok temaba jenjang nung tembangdir parnok nem USD 10,000 agütsütsü. Tanabuba jenjang nung takok angur nem USD 5,000 aser bronze medalists anaprongla nem USD 2,500 agütsütsü," ta International Boxing Association-i sangdong ka ajanga metetdaktsü. AIBA tir Umar Kremlev-i ashiba agi, iba jenjang agiba ajanga boxer tem pei akokba tashi tajungtiba agi asayatsü ajungmesotsü.

"Boxer tem meranga inyakba taa angutsü tim. Sen

agi asayatem ajungmesoba dang masü saka iba ajanga parnok kibongtem rongsenket nung tangar dak metaloker malitsü asoshi maongka agütsütsü. Onoki jenjang agiba ajak ya boxer tem ajangzüktsü atema lir. Parnok ya onok atema tongtibangtiba lir. Asian Championships nung shilem agirtem ajaki ring nung pei dak aketba sempet tajungtiba sayutsü aser anema alitsü imlaja atar," ta pai ashi.

Iba asayamung nung India nung asayatem world championship trokben tashi koker alila M C Mary Kom (51kg) aser defending gold-medallist Amit Panghal (52kg) nati anir asayatsü. India den Afghanistan, Bahrain, Indonesia, Iran, Iraq, Jordan, Kazakhstan, South Korea, Kuwait, Kyrgyzstan, Laos, Macau, Malaysia, Mongolia, Nepal, Pakistan, Philippines, Qatar, Sri Lanka, Syria, Tajikistan, Thailand, Turkmenistan, United Arab Emirates, Uzbekistan aser Yemen nung aser ajak iba asayamung shilem agitsü atema züngoksemogo.

Manish aser Satish na Asian Boxing Championships nung masayatsü



Monupii/May 19, 2021 (Agencies): Olympic nung asayatsü atema qualify ser aliba boxer, Manish Kaushik aser Satish Kumar nati May 21 nü nungi tenzüka Dubai nung asayatsü aliba Asian Boxing Championships nung shilem magitsü telemtetba agiogo, kechiyong tenaprongla Covid-19 agi shirangba sülen ano temang kanga junga mesüingjemi lir.

"Kaushik dak Covid-19 tashidak keta mali ta jangjabaji onok atema osang tajung. Ajisiüaka pa normal training agi metenzük asünung, pai Asian meet nung shilem magitsü telemtetba agiogo," ta national camp nung sendaka aliba coach

kati Patiala nungi IANS dang ashi.

Kaushik Olympics nung tebur 63kg category nung asayatsü atema qualify süogo aser Kumar-a tebur 91 kg category nung asayatsü atema qualify süogo. Boxer anaprongla tang Patiala kübok National Institute of Sports nung agia aliba national camp nung shilem agidar.

Arishi küm 25 tain asayar Kaushik-i 2021 küm asaya kanga takok nung tenzükogo. Pai March ita Spain nung invitational boxing tournament ka nung takok tajung nguogo.

National team coach-i ashiba agi, Kaushik iba hopta nungi tanem tanemi training agi tenzüktsü.

"Onoki 30 nungi 40 percent tashi ka nung tenzüktsü aser tanem tanem taliba agitsü. Onok kecha aritepa mali, kechiyong onok nükjidongji Tokyo Olympic Games nung junga asayatetsü atema yur lir," ta coach-isa ashi.

Kasa mapang nung arishi küm 32 tain Kumar training tenzükogo, saka pa kangabo mebelemdaktsü dang training agidar. "Pa asayamung nung tokteptsü atema temsü mali anungji onoki pa anisüingzükdaktsütsü atema telemtetba agiogo," ta coach-i shisem.

India team züngsemtem May 22 nü Dubai aotsü kechiyong parnok May 24 nü nungi asaya tenzüktsü.

BCCI-i Special General Meeting ka ayonger

Monupii/May 19, 2021 (Agencies): India nung taruba cricket season atema sensak asemtsü asoshi BCCI-i May 29 nü Special General Meeting ka ayongogo. Iba senden nung October aser November ita India nung asayatsü aliba T20 World Cup atemaa sensak asemtsü.

BCCI secretary Jay Shah-i senden ayongzükba indang osang lemsatepba nung "India nung wara pokteter aliba temulung dang yur taruba cricket season atem sensak asemtsü," ta shia lir.

COVID-19 wara tanabuba wave agi India ajunga kanga mejungi kongshir aliba ajanga T20 World Cup ayongzükba asayatsü atema tejangja ka makai kümogo.

SGM ya June 1 nü ICC senden mamen tsüingda ayongzükogo. Iba senden nung alima ajunga nung cricket

achaayangba lokti yagi World Cup asayatsü aliba dak sendakba nung telemtetba ka agitsü imlar.

India nung COVID tensa apir ICC-i telemtetba ka agitsü imlar.

IPL-14 tom nung athitsüsa akümba sülen WC ayongzükba asayatsü atema UAE asadangdar. Bio-bubble telung nung nisung aika dak COVID-19 tashidak potetba sülen IPL athitsüsa aküm.

Taoba ita senden nung BCCI-i World Cup atema tesem teku shimogo. Tesemtem rongnung Ahmedabad, Bengaluru, Chennai, Delhi, Dharamsala, Hyderabad, Kolkata, Lucknow aser Mumbai densembe lir.

Kasa mapang nung special senden amenba mapang domestic cricket dak sendakba nunga ken o aika benoka sensak asemtsü.

BILEMDANGANG

"Kuli tejangja makai nisung ka o tebandang."